


洵陽縣鄉土志

歷史
未置以前
既置以後

政績錄
興利 去害 聽訟

兵事錄
涉及本境 全在本境者無



鄉土志

小引

常璩華陽國志魏興郡屬縣六洵陽縣下祇記洵水
所出四字此則常志之畧也洵邑古稱洵州歷代分
設興晉驢川黃土涇陽長岡皆在縣境內境土既濶
其所鍾毓亦多有足傳者茲遵鄉土志例目編輯成
書意取便於童蒙特仿華陽國志先賢士女讚兼仿
近世羅澤南小學韻語之式據府縣志聯為四言韻

語其事畧互見於分註淺陋之譏有所不免但期童

穉易曉云爾

歷史

星分井鬼地接洛商東周創建號曰郟陽

周禮保章氏注鶉首秦也唐書天文志東井與鬼

鶉首也嘗考

欽定

明史天文志所紀井九度至柳三度鶉首之次也

陝省所轄各州府皆屬井鬼分野洵陽隸興安府

興安古金州自當以井鬼分為是其地廣袤西北

境接商洛考縣志沿革表邑創自東周厥名郟陽

乃建置之始也

未置以前

夏商梁州庸國之分周屬荆楚地瀕漢濱

縣境包洵界漢夏商時未設邑本梁州域屬庸國
東周而後漢上諸姬楚實盡之故又屬荆州之楚
矣

既置以後

秦曰旬關漢號旬陽屬漢中郡縣志甚詳

秦漢皆屬荆州漢中郡秦曰旬關漢曰旬陽縣縣
志沿革表載之甚悉

後漢縣廢併入西城平陽旬口三國易名

後漢隸益州縣廢入西城三國時屬荆州魏興郡

縣境分設為二曰洵口曰平陽戍

晉宋齊梁俱屬魏興旬陽興晉畫界相通

晉初隸荊州惠帝時改隸梁州宋齊梁因之俱屬魏興郡分縣為二曰旬陽縣曰興晉縣

魏分縣境有曰涇陽北周遞改黃土長岡

梁末分梁州為南梁州至魏又曰東梁州分縣境為三曰洵陽縣洵州涇陽縣俱屬洵陽郡涇陽郡北周時改梁州為金州總管府郡二曰洵陽郡涇陽郡其洵陽縣洵州如前改涇陽為長岡縣又改長岡為黃土縣改旬為洵自北魏始

隋設二縣屬梁州治唐分六區旋改即廢

隋設縣二洵陽縣黃土縣俱屬梁州西城郡唐分縣境為六洵州洵陽縣黃土縣洵城縣驢川縣涇

陽縣俱隸山南東道屬金州漢陰郡安康郡改置
不久即廢後惟存洵陽涇陽二縣

越後五代沿至宋室洵陽涇陽併二為一

五代至宋皆二縣俱屬金州在蜀隸雄武軍後唐
隸戎昭軍後晉漢周隸懷德軍宋興又改梁州為
京西路昭化軍縣屬金州安康郡乾德四年省涇
陽縣併入洵陽

洵陽巡檢創自有元明設白河漢水毗連

南宋只洵陽縣隸利州路安撫使屬金州元設洵
陽巡檢司隸興元路屬金州明代縣如舊又設閭
關三岔二巡檢司隸陝西布政司屬漢中府金州
成化十二年改隸鄖陽巡撫割縣屬之白河堡置
白河縣其二
巡檢司仍舊

迨至本朝巡檢俱廢屬興安郡七縣之一

順治四年省閭關巡檢司縣制如明其三岔巡檢
司未如何年廢康熙元年省鄖陽巡撫不兼隸乾
隆四十七年改并州屬之漢陰縣設安康縣改州
為府屬邑七安康漢陰平利洵陽紫陽石泉白河
是也

政績錄

明朝

明初設縣李肅開荒始建衙署善撫流亡

前代無考明洪武五年李肅蒞任因元巡檢司舊
址辟草萊撫流亡後之有人民社稷者以肅為首
功云

張勉惠愛百姓攀留因家於洵貽厥孫謀

勉山東鉅野人正統間由舉人蒞任勤政愛民人盡悅服代之日百姓泣擁馬首不得行遂家於洵孫鳳翔曾孫先洵登科第

杜琳宰縣改建學宮並移縣署未竟其功

杜琳直隸魏縣人資格不可考成化八年漢江漲溢縣治傾頽學宮故在洵許亦圯於水琳改建縣署於今治所並移學宮於縣西高阜處厥功未竣卒於官

繼任王公克蕨其事訟簡盜息民安井市

王延齡山西渾源州人琳功未竣延齡克蕨其事縣志稱其政簡盜息與民相安

邑多廢墜蔣公勤修瑞應疊見石立望候

蔣昺字克明山東人成化丙戌進士授行人改官御史陳言謫四川建昌衛知事宏治元年遷長洲縣調洵陽是時邑中廢墜者尚多昺勤於修理瑞應疊見累遷山西按察司僉事洵人思之立望侯石於學宮前

御史高公直言謫此行政臨民果剛任事

公韶四川內江縣人宏治乙丑進士正德中官御史劾王瓊誤邊計瓊怨奏訐公韶中旨謫官世宗立起謫籍歷右副都御史巡撫江西終戶部右侍郎洵陽舊志謂其由御史左遷於此

羅公遇早步禱山硯甘霖沛降轉歉為豐

熙四川射洪縣人嘉靖時由舉人蒞任廉靜愛民

遇旱齋戒徒步禱於羊山之谷壘洞為文以祭俄而雨澤霑足賴以有年

陳公大道來自四川寬和明斷物阜民安

大道四川南充縣人陳文端公之族人門第鼎盛而大道宰洵寬和明斷土人懷服其為循吏可知
南北宰洵威惠並施百廢俱興手輯邑志

南北濮州人萬歷丁丑進士除邑令期年之內威惠大行洵舊無志兆嘗手輯一編於當日之賦重役煩深為太息其軫念民艱已可概見後之修志者藉以考訂皆南北招撫之力也

史姚二公創修城垣苞桑之固民賴乂安

史采湖廣蘄州人姚世雍直隸萬泉衛人先洵邑無城垣惟縣署周以石牆崇正七年流賊自鄖陽

溯江而上陷紫陽平利邑遭焚劫民逃山谷或喘
息舟中采由興安州州判來署縣事集紳士梁喬
等建議築城面江一帶百雉甫就而新任姚世雍
至悉告以顛末世雍以身任之不數月而工竣於
是完室宇招流亡建炮台通水門脩豫完繕明年
賊至莫敢睥睨相率遁去士民感其德澤建祠尸
祝之

余公佐理獄訟無滯修駝嶺路醫藥普濟

余大鑿字德孚湖廣武岡州人萬歷年間任洵陽
典史上下和睦獄訟無滯駝嶺路險公捐貲修之
又知醫施藥人賴以濟邑人易乾有修路碑記之
衷燦宰洵惠政尤多問闔安堵載道謳謌

李衷燦江南含山縣人順治十年知縣事多惠政
問闔安堵口碑載道遷冀州知州歷官衛輝府同

知所至皆有惠政

陳公賢令善政感人百廢俱舉典廟一新

陳元賓湖廣江陵縣人康熙十年令洵陽多善政百廢俱興倡修城隍廟及關帝廟文昌閣邑人鍾儀奇各為碑記

沈公天祥吏員遷秩撫字留心紓民財力

天祥字吉人浙江鄞縣人由吏員官寶鷄縣丞遷秩洵陽甫下車即委興安州篆天祥留心撫字期於克濟邑令之宰斯土者屢念民瘼當以天祥為首云

徭役繁興又值荒旱籲懇蠲減得邀勘驗

康熙十九年西蜀用兵天祥奉文採買軍糧又轉運鎮安糧石赴平陽關接濟時軍機旁午詳請州

屬六邑地瘠民貧不能供應得減轉運徭役並採
買賠累在洵時復籲請蠲荒乃得部使勘驗卒允
其請

供應浩繁一身獨任貧無長物鬻妻釵釧

時部使勘驗上游批駁供張調停雜費皆一身任
之天祥固貧坐是益困至鬻其夫人之釵釵以償
竟得蠲荒銀一千七百餘兩

貧不能歸遂家於洵煙墩嶺上瞻墓傾神

天祥宰洵十五年屢署漢陰白河諸篆操守如一
卒於官貧不能歸遂家於洵葬草坪之煙墩嶺邑
貢生王夢覺有碑序記之甚詳見縣志藝文志

于公維琇載丁於糧詳請定例民免逃亡

琇山東人雍正四年以知州用借補洵陽次年奉

文載丁於糧瑋詳請定例貧民得免追呼遇早禱
雨鄉民田鼓盈城不下千餘人給以饘粥之資其
仁可知後遷秩四川綿州知州

韓公決訟如流無滯兼除積弊碑立去思

韓德修字子念直隸深州人雍正元年由舉人任
洵陽廉隅自飭決訟如流循聲為六邑之最舊俗
鄉民供柴炭概不給值德修除其弊去之日邑民
立去思碑於東關外

吳公萬善秉性慈良創修義塾學校克昌

萬善貴州平遠州人雍正四年由舉人任洵陽秉
性慈良輿情相安邑中學校廢弛萬善創修義學
延師設教邑之有義學實自公始

卓哉劉公金川不靖赴勦調兵從容肆應

劉琪字東玉順天宛平縣人乾隆三年舉人才具
明敏宰洵時兼署平利縣篆時值金川不庭調興
漢鎮兵赴勦度支供應絡繹相繼琪從容肆應罔
有貽誤又刊蓋田呂氏鄉約以勸禮讓又教人養
山蠶於黃杼嶺以興絲織後薦調興平縣
勸民禮讓又課蠶桑盡心教養無愧循良

羅公巨川增修書院名宿主講文風丕變

巨川名鼇江西南城縣人乾隆己丑進士宰洵邑
留心文教增修義學顏曰敷文書院延名宿主講
自此文風日盛以終養歸

明敏郭公初官斯土聽斷如神案無留牘

聯奎雲南河陽縣人由舉人任縣事聽斷明敏

農桑既興示以禮讓善政遞施民樂教養

又勸課農桑念山城禮讓不先常舉行鄉飲酒禮
民知感勸終江西瑞州知府

矯矯薛公清介絕俗役畏民懷上稱廉吏

中巖山東范縣人由舉人任洵陽清介絕俗不解
迎合上官諸弊悉革大府知其廉於班行中指之
曰是廉吏某耶投謁即見之告歸之日自署前至
江干擁道不能行舟至樊城無僱車之費質衣覓
輿以歸

何公宰政清惠勤廉去官之日行李蕭然

大成四川夾江縣人由舉人除邑令留心民事凡
爭畔者舊令每責成於鄉保胥役代勘祖稟經年
莫結大成必躬親履勘始定判斷以外艱歸束裝

之日麓中僅數十金

鄧公夢琴惠政孔多荒地開墾邀免升科

鄧夢琴字虞揮江西浮梁縣人乾隆時進士蒞任時荒地多開墾大府歲檄升科琴言流民開荒十數年不可使失所他徙由是洵陽縣不報升科焉

注意書院兼修義學縣志改訂教重閩洛

又注意書院立義學改修洵陽縣志其教人以小學近思洛學編為宗

嚴公如煜淑浦異才生時母夢大星墜懷

嚴如煜字炳文號樂園湖南淑浦縣人母夢大星墜懷而生

考取優貢學使褒揚條陳方略旋任洵陽

公乾隆時優貢張學使稱為經世才嘉慶五年以
孝廉方正赴

廷試

詔詢平定三省善後事宜煜策上稱
旨復策上屯田方略十二事旋以知縣發陝西下其疏
於三省大帥督撫令采行明年蒞任

教匪方熾設防禦敵堅壁清野賊勢窮矣

縣與蜀楚邊界相錯教匪往來力主堅壁清野議
相地險要為寨堡選團勇正副長且耕且守且戰
賊勢大蹙

屢戰掃平賊逃遠地勸桑課農三年大治

公又督寨勇勦七股賊於太平寨凡萬餘人一戰
平之賊憚如煜威名相戒勿入境治洵三年慎重
祀典勸課農桑

閑臨書院親誨且詳遇早步禱雨透衣裳

公嘗至書院親誨諸生遇早步禱山洞歸途冒雨衣裳盡濕

馬首訴冤一言剖斷父老述傳循吏之冠

公或因事至鄉見禾稼暢茂者賞之荒蕪者責之鄉民迎馬首訴冤立呼兩造一言剖斷人咸悅服故百餘年來父老述循吏以公為巨擘焉後陞至陝西按察司著作有三省邊防備覽行世

修寨練團陳公秩五訓練躬親土匪窮蹙

秩五號愷齋河南信陽州進士蒞洵陽性剛果嫻武畧時四川土匪蠢動紛擾漢興府屬秩五設民團躬親訓練飭修四鄉堡寨土匪不敢犯以疾卒於官

賢令孫公由幕保舉利弊周知奸惡斂迹

少蘭名濰浙江山陰人由幕保陞知縣同治三年蒞任凡八年洞知利弊姦滑斂跡

髮逆之亂焚燬可慘勤修廢墜一律煥然

同治二年髮逆破興安洵邑戒嚴城外寺廟民房皆焚燬亂後濰蒞任乃重修文廟文昌宮敷文書院及明倫堂靈岩寺等處

捐廉倡率夙夜辛勤設養濟院惠及孤貧

是時百廢俱修皆公捐廉俸為之倡又創設養濟院及漏澤園以恤孤貧後卒於官

方公救荒四鄉辦賑井井有條躬親其任

文川名道南河南羅山縣舉人光緒元年署洵陽

縣事三年歲大凶道南諭城鄉辦賑井井有法四鄉勸勉且躬親之

設局平糶惠及洵人饑民滋事消患初萌

公又稟散倉糧設平糶局惠及士民饑民滋事獲數人置之法民賴以安

趙公秋崖山東之傑激揚風教表彰名節

秋崖名嘉肇字孚民山東蘭州縣人由舉人署任其政以激風教表彰名節為先務孝子楊鴻春割肝愈母則詳請旌表祝朱氏以死殉夫則紀事於縣志之末所著有忠孝聞見紀畧

兵事錄

漢

沛公下宛酈商相從定縣十七旬關被攻

史記酈商從沛公下宛穰定十七縣別將攻旬關據索隱云旬關漢中旬陽縣旬水上之關也

南宋

統制許青王彥所使大戰金兵敗敵於此

建炎四年五月敵攻金州王彥遣統制許青等與戰於漢陰敗之又敗金兵於洵陽縣

有任天賜克復豐陽率其勁旅道出洵疆

建炎三十一年十月金州都統制王彥遣統制任天賜道出洵陽克復豐陽縣

統制郭進嚴守洵陽金兵猝至死節堪傷

進不知何許人高宗時官統制紹興三年王彥節
制軍馬正月金兀朮入侵王彥與吳玠劉子羽會
張浚於興元撒離喝自上津疾馳至洵陽進死之

明朝

郭君繼宗守紅岩關禦紅巾賊桑梓保全

繼宗元末守紅岩關禦紅巾賊之亂保障桑梓民
賴以安

鄧愈屯兵在牛心石營名大夫猶存遺蹟

洪武元年鄧愈帥襄漢兵取南陽以北未附州郡
諸州縣相繼降兵屯牛心石攻服洪山諸寨均房
金商之地悉定今蜀河內有大夫營遺蹟相傳為
鄧愈屯兵處云

主簿薛昌追勦流賊死節留芳漢洵之湄

昌河南盧氏縣人嘉靖初流賊王大王二焚劫鄉
村昌率兵追勦親冒矢石死於難

明之季世有陳奇瑜也家溝中斬賊千餘

崇正六年擢陳奇瑜總督軍務奇瑜督將士由竹
谿至平利之烏林關斬流賊千七百餘級至洵陽
也家溝斬賊千八十級

國朝

李公良臣守備盡職寇掠南境屢殲渠魁

良臣字平遠宜川縣人時定鼎之初餘寇竄伏楚
之竹房間肆掠洵陽南境
廷議於七里關設官兵守險良臣以守備奉檄來防盜

賊望風屏迹先後擊賊於房縣直搗巢穴殺其渠魁又招降偽總兵副將等巨寇蕩平

張公先志守七里關躬歷山險誓勦土番

先志長安縣人康熙時武解元授七里關守備雍正時勦卓子等山土番

力竭遇害肌膚無完奉

旨祭葬世廕綿延

是時先志獨當一面率兵十五人進覘賊壘適林中番眾突出矢盡力竭遇害

奉

旨贈加一級賜祭葬廕一子以衛千總用

圖海奇兵走兩河關冒雪攻賊轉戰無前

朝廷以圖海為撫遠大將軍康熙十五年王輔臣叛

賊據兩河關時河橋未就海令軍士伐木山中一

夕浮橋成會風雨大作遣奇兵從間道走兩河關
後乘高急攻克之

統綠旗兵破其不意賊將晉卿望風遁去

康熙十八年十月大將軍令團總統綠旗官兵攻
取興安至兩河關賊阻河結營自固圖出其不意
策馬徑渡連破七營賊將韓晉卿望風遁走

教匪之亂時擾邑邊富國破賊於鷹嘴山

邑境兵事以教匪為最然亦涉及本境及來犯本
境也嘉慶四年賊匪高二馬五等來犯總督倭什
布遣千總黃富國率竹山練勇追至洵陽鷹嘴山
大捷斬首數百級

經畧大臣姓額勒氏殲藍號賊於大棕溪

嘉慶五年四月經畧大臣額勒登保率官兵殲藍

號賊首劉允恭於洵陽大棕溪

德侯明亮扼賊鎮安夾擊洵陽俘馘數千

賊趨鎮安德侯楞泰馳赴米糧川扼其赴山陽之路與明亮夾擊於鎮安洵陽先後俘馘數千餘賊西遁

楊侯遇春扼賊兩河大小棕溪殲賊孔多

嘉慶五年閏四月賊將西竄楊遇春扼兩河口去路連破賊於大小棕溪殺賊千餘

賊欲南竄官軍如城楊辛張伍死於茅坪

官兵偏賊於銅錢溝山後絕壁無路賊欲突死出溝口官兵圍攻擒斬五千餘遂進攻楊辛張伍等死於茅坪

德侯楞泰追勦徐賊殄于洵陽英勇無敵

六年四月德楞泰追勦徐添德由官家河追至洵陽縣五月追徐添德於兩河口擒賊五百盡獲各賊妻孥添德溺死於仁和新灘渡餘党由洵陽渡河知縣嚴如煜率鄉勇擊之覆其舟復獲賊將張天倫

長齡勦寇率索倫兵馬高二賊敗於洵城

六年十月長齡率索倫千餘騎及粵兵千人迎勦馬高二賊於洵陽大破之先後斬賊二千

謝氏璠璵御賊有功擢為巡檢部選竊峯

璠璵蜀河鋪人嘉慶時教匪之亂帶勇殲賊前鋒獲賊首李順安邑令嚴公保璵巡檢部銓湖北鶴峯州

居午辦團擒獲賊魁部選巡檢官於廣西

午問河鋪人辦團守禦獲賊魁李宏顯督修西路
各寨邑令嚴公保午巡檢部銓廣西岑溪縣